

## ORÍGINIS DE FURTEI

Sa bidda de oi, de orgini Medioevali (regioni stórica de sa Valenza-Marmilla), postu a m. 90 asuba su mari (26,12 Kmq.), contat 1.724 abitantis e si ddoi arribat a manera fàcili fadendu sa SS. 197 po 4 Km. pustis su bìviu de Villasanta (SS. 131 Km. 40), concas a Barumini.

Sa parti prus antiga est prus o mancu de su 1290 invecias su topónimu, fortzis de orìgini prelatina, est atestau a partiri de su 1341 (ecclesie de Frutey calaritanè diocesis), ma is interpretatzionis asuba su chi bollit nai funt pagu siguras meda.

Puru chi amancant, segundus is circas fatas fintzas a oi, arrestus prenuragicus, est cosa clara ca su logu est stétiu bìviu chena pàsiu: dd'atestant unus cantu nuraxis (*Cummosariu, Bangius, Sa Conca Manna, Monte Cresia, Noraxiais e Su Bruncu 'e su senzù*) e is arrestus de civiltadis antigas agataus me is localidadis S. Salvatore e Su Bruncu 'e su testivigliu.

Pagu funt is testimonias punicas (localidadì Santu Brai), pagu meda is arrestus romanus e de cussus abarrat scéti unu ponti antigu de pedra acanta a sa bidda.

No funt pagu invécias cussus de s'época giudicali e aragonesa ca faint biri Furtei comentì a una bidda de calincunu importu. Impari a is biddas de sa Curatoria de Nuraminis, Furtei fiat batallau intra is Giudicaus de Arborea e Casteddu e de cust'urtimu storicamentì fiat.

Cun s'arruta de Casteddu in su 1258 est stétiu donau a s'Arborea, assumancu po unus corant'annus, candu Mariano II de Bas Serra, dd'iat lassau (impari cun àterus logus) a su Comunu de Pisa.

Cun sa dominatzioni aragonesa, Furtei, est stétia donada in féudu in su 1358 a G. Bertrando de Torrente.

Candu is Aragonesus ant cunvocau in Casteddu su primu parlamentu, Furtei, ca giai gosada de privilégìus e franchìgia at mandau is rapresentantis suos, pustis, in su 1414, est stétia fata sa Baronia de Furtei, ca est stétia donada a Michele Sanjust. Sa bidda est abarrada a is Sanjust fintzas a su 1839, candu est stétiu arriscatau.

Oi Furtei est connotu de totus po is minieras de òru.